



**TERTIB ACARA KEBAKTIAN MINGGU
GKPS P.BULAN-RESORT POLONIA MEDAN
Minggu XVIII Dob Trinitatis, 11 Oktober 2020**



TOPIK: "Pambobai na Sirsir Gabe Juak-juak"

Live streaming: www.gkpspadangbulan.com/tv

Tata Ibadah: <http://www.gkpspadangbulan.com/tatib>

1. Votum – Introitus – Tonggo

P. Riap ma hita Jongjong!

Ibagas Goran ni Naibata Bapa pakon Tuhan Jesus Kristus ampa Tonduy Na Pansing, Sitompa langit pakon tanoh on. Amen

Ai huhira, sitaronon bani panorang sisonari seng satimbang in marimbang hasangapon, na sihol sipatalaron ope banta. Halleluya, Halleluya, Halleluya.

K : Halleluya, Halleluya, Halleluya (idodingkon)

P : Martonggo ma hita!

Ham Tuhan Naibata parholong ni atei banggal. Ham do harohan ni apoh- apoh na tarsulur hubani halak na marpusok ni uhur, ampa gogoh na sumurung hubani halak na ibagas hagalekon. Tatap Ham ma hanami na martumpu on, ase malas uhurnami janah margogoh mandompakkon bagei ni hamaholon. Tangihon Ham ma pangindoannami on, Ham Tuhan sipangapoh, haporusan, parbansahon pakon batat-batar na toguh marhitei Jesus Kristus Tuhannami. Amen (*Hundul kuria*).

2. Mandoding 219. Marmegah-megah Hita on (1+2)

1. Marmegah-megah hita on mamuji Naibata.

Ai idop ni uhur-Ni do na masuk bai uhurta in.

Ibaen nuan mardomu in,
ijon sadari on, ijon sadarion

2. Halani ai sai gogoh bei, ganupan hita on.

Mamuji Tuhan Jesus in, parholong atei banggal in.

Sibahen hamegahon in

Ronsi magira pe, ronsi magira pe.

3. Hasasapan ni Dousa

P. Riap ma hita jongjong!

Martonggo ma hita, sopotkon hita ma dousanta hubani Tuhan Naibata. Ham Tuhan Naibata simada sagala na adong, sibotoh haganup anjaha Naibata parpintor. Lajari Ham do hanami ase manghamalashon pasu-pasu na dob ipaondos Ham hubannami. Tapi gati do lang ihasonangkon hanami sibere-bere-Mu, janah iajamkon hanami do gogoh, pingkiran sonai age uhurnami sandiri, laho mansuhunni sura-surannami. Jajat na hurang podas do pangahapnami martambah sinadongan, gabe ipindahi hanami parhiteian na so tiba dalanni. Lang homa ipakei hanami panorang na binere-Mu in ibagas gok tanggung jawab. Gati do lolei hanami laho mangindahi Ham halani mamparayak arta na laho salpu in. Ham Tuhan marpangulaki ma uhur-Mu mangidah ganup dousa pakon hajahatonnami in. Hartuki Ham ma uhurnami ase ulang inunut hanami be mangkorjahon dousa pakon ganup na jahat in. Topa Ham ma uhur na bayu marhitei Tonduy-Mu, ase tongtong hanami manggoluh ibagas hapintoron-Mu. Ibagas Jesus Kristus Sipaluah in, sasap Ham ma dousanami anjaha jalo Ham ma tonggonami on. Amen.

Tangar anjaha haporsayai hita ma Hata ni Naibata, bagah-bagah pasal hasasapan ni dousa.

Ibagas la do dapot hita haluahon marhitei daroh-Ni, ai ma hasasapan ni panlanggaron, domu hubani habayakon ni idop ni uhur-Ni, na unjah binerehon-Ni banta ibagas hapentaron ampa hauhuron.

Ibagas holong ni Naibata, domma isasap haganup dousanta. Halani ai, pataridahkon hita ma tanda-tanda ni pargoluhon na bayu. Hasangapon ma bani Naibata I babou.

K : Amen

(*hundul kuria*)

4. Mandoding 151. Dong do Bah Tubuh Dear in (1+2+7+8)

1. Dong do bah tubuh dear in, bai na mardousa in;
Jenges tumang bah tubuh in, pasonang uhurhin.

2. Bah tubuh na mapansing in, in ma Jesusta in;
Isasap do siningta in, ibuat horungkin.

7. Sai dihut au paluah Ham, padaoh na bursik in;
Bannami sai patongtong Ham, haporsayaon in.

8 Ai na margogoh do tongtong daroh-Mu na durus,
pansing ibaen in uhurhon, bulat janah torus.

5. **Hata Haporsayaon**

P. Riap ma hita jongjong!

Saksihon hita ma haporsayaonta in, songon na sinaksihon ni haganup halak na porsaya bani sab tanoh on!

P+J. Ahu porsaya bani Naibata Bapa, Pargogoh na so tarimbang, na manompa langit pakon tanoh on. Ahu porsaya bani Jesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei tonduy na pansing. Na manaron na parngit, bani panorang ni si Pontius Latus, iparsilangkon, matei anjaha itanom, turun hu nagori toruh. Mulak manggoluh humbani na matei bani ari patoluhon. Naik hu surga anjaha hundul i siamun ni Naibata Bapa, Pargogoh na so tarimbang in. Hunjai ma la mulak magira laho manguhumi halak na manggoluh pakon na dob matei. Ahu porsaya bani tonduy na pansing, bani kuria parsadaan na mapansing in, parsaoan ni sagala na mapansing in, bani hasasapan ni dousa, bani parpuhoon ni angkula, pakon bani hagoluhan na sadokah ni dokahni. Amen!
(hundul kuria)

6. **Tingting + Tonggo Pangapition**

7. **Mandoding 503. Gok Bai Malas ni Uhur (1+2+4)**

1. Gok bai malas ni uhur do au, mamuji Ham Tuhanku.
Ai ipanalom Ham hape au, marhorja bai pohon-Mu.
Megah, megah uhurhon, mangkorjahon parentah-Mu.
Boi au dirgas nuan on, Ham do na mamasu-masu.

2. Ham do na boi mambaen au talup, hatengeran bai horja.
Ase torsa horjangku ganup, Ham do na mardimata.
Megah, megah uhurhon, mangkorjahon parentah-Mu.
Boi au dirgas nuan on, Ham do na mamasu-masu.

4. Huharinggaskon ma haganup, horja na ondos bangku.
Janah sai huhorjahon pongkut, baen sangap ni Goran-Mu.
Megah, megah uhurhon, mangkorjahon parentah-Mu
Boi au dirgas nuan on, Ham do na mamasu-masu.

8. **Ambilan: MARKUS 10:35-45**

9. **Manggalang:**

P. Paima iondoskon hita galanganta, tangar hita ma lobei hata ni Naibata na gabe onjolan banta laho manggalang, aima tarsurat bani: Heber 13:16
“Mambahen na madear ampa na marsibere-bere, ulang ma halupahon nasiam ai, ai galangan na sonai do iharosuhkon Naibata”. **Sonari ondoskon hita ma galanganta!. Sonari ondoskon hita ma galanganta!**

217. **Haganupan na Sauhur**

1. Haganupan na sauhur mangindahi damei in.
Dompak Jesus na pabulus holong ni uhurta in.
Ai Tuhanta do ulunta, hita pagori-Ni in.
Tuhan Jesus do gurunta, hita susian-Ni in.

3. Sai pasada Ham, o Tuhan, ganup na porsaya in.
Ase marsihaholongan, domu bai titah-Mu in.
Marhiteihon hasintongan, in do tong ipindo Ham.
Sai padomu Ham hasoman, na dob isondangi Ham

10. **Tonggo Galangan – Panutup – Pasu-pasu:**

P. Riap ma hita jongjong!

Martonggo ma hita mangondoskon galanganta hubani Naibata!
Ham Tuhan Naibata, Bapanami, pardear layak janah na unjah hu bannami. Tarima kasih ma hatahononnami hu Bamu, halani tongtong do ipasu-pasu. Ham goluhnami. Domma ihasomani Ham janah ipasu-pasu Ham horjanami das hubani sadari on. Sonari, ibagas malas ni uhur roh do hanami mangondoskon buah ni horja na dob pinasu-pasu-Mu in gabe galangan hatarimakasihon pakon puji-pujiannami hu Bamu. On pe sai jalo Ham ma galangannami on, bahen hasangapon ni goran-Mu janah mambahen lambin marhataridahan harajahon-Mu i dunia on. Ibagas goran ni Anak-Mu, Jesus Kristus Tuhannami, jalo Ham ma tonggonami on. Amen

K. Mandoding Halleluya No. 340:1

Huondoskon bani Jesus haganupan diringkon
Ia do pasangaponku sadokah bai goluhkon
Huondoskon ma, huondoskon ma.
Bani Jesus Sipaluah, huondoskon ma

P. Ham Naibata paridop ni uhur, ipasirsir Ham do sagala na porlu bannami lobih humbani na niarapkonami ampa na tarpingkirhon hanami. Patubuh Ham ma holong-Mu na bangga in ibagas hauhuronnami, ase marhinsah ni uhur hanami mangkaholongi Ham bani ganup goluhnami. Bahen Ham ma hanami parsimada bani bagah-bagah-Mu na sumurung in. jalo Ham ma hanami pakon tonggonami marhitei Jesus Kristus, Tuhan na manggoluh anjaha markuasa rap pakon Naibata Bapa ibagas hasadaon ni Tonduy Na Pansing. Amen

P : Ham Bapanami na i nagori atas. Sai na papansing ma Goran-Mu. Sai roh ma harajaon-Mu. Sai saud ma harusuh ni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousanami songon panasapnami bani dousa ni hasoman na mardousa dampak hanami. Ulang hanami bobai Ham hu parlajouan. Paluah Ham ma hanami umbani pangagou.

K : *Ai Ham do simada Harajaon pakon Hagogohon ampa Hasangapon sadokah ni dokahni. Amen (idodingkon)*

P: Laho ma nasiam, janah pindahi nasiam ma na madear, ulang ma na jahat, ase manggoluh nasiam, ase tongon ma Jahowa, Naibata Zebaot hasoman nasiam, songon na hinatahon nasiam”

P : Jalo ham (*hita*) ma pasu-pasu humbani Tuhan Naibatanta: Ipasu-pasu anjaha iparorot Tuhan Naibata ma ham (*hita*).Isondangkon Tuhan Naibata ma bohi-Ni hu bamu (*hu banta*) janah maidop ma uhur-Ni mangidah ham (*hita*).Idompakkon Tuhan Naibata ma bohi-ni hu bamu (*hubanta*) janah ipasorap ma damei-Ni bani tonduymu (*tonduyta bei*). Amen.

K : (mandodingkon) Amen, amen, amen.